




ԵԿԵՂԵՑԱԿԱՆ ԲԵՄ. ԼՈՒՐԵՐ

Մայիսի 4-ին, կիրակի.—Տօն Երեման Ս. Խաչի.

Այսօր Մայր տաճարում, Ավագ խորանի վրա, ս. պատարագ է մատուցում Տ. Հովհաննես ավագ քհն. Մարությանը և «Հայր մեր»-ից առաջ քարոզում՝ «Սա պահեստ է գտնվում լամենայն փորձություններ» բնաբանով:

Ս. պատարագին ներկա էր Վեհափառ Հայրապետը:

• •

Նույն օրը ուխտավորաբար Մայր Աթոռ և Վեհափառ Հայրապետին է այցելում Պլովդիվի (Բուլղարիա) հայոց հոգևոր հովիվ Տ. Սահակ քհն. Մեսրոպյանը:

Այս առթիվ Վեհափառ Հայրապետը, որպես գնահատանք տեղի հոր երկարամյա եկեղեցական ծառայության, նրան պարգևատրում է քահանայական լաւնշախաչով: Այնուհետև տեղի հայրը Նորին Սրբությանը հայտնում է շնորհակալության հետևյալ իր խոսքը.

«Վեհափառ Տեր,

Թույլ տվեք մի քանի խոսք րոտմ, երջանիկ եմ այս պահուն, հայրենի հողին վրա, Սուրբ Էջմիածնի այս սրբազան հարկին

տակ, մեր սիրելի սրբազան առաջնորդին և իմ հոգևոր ծնողիս միջնորդությամբ:

Վեհափառ Տեր, գնահատեցիք իմ հոգևոր աշխատանքս Պլովդիվի եկեղեցվում մեջ, նույնպես իմ ծառայությունը հավատացյալ ժողովուրդին հանդեպ: Այսպիսով արժանացա սրբատառ կոնդակի, և Դուք հիմա իմ կործքս կգարդարեք քահանայական լաւնշախաչով: Ասիկա մեծ ուրախություն և մեծ բախտավորություն մըն է ինձ համար և կյանքիս մեջ չկրկնվող օր մը:

Սիրելի ու հարգելի Վեհափառ Տեր, ես խորին շնորհակալություն կհայտնեմ, մանավանդ Ձեր ուշադրությանը ու հարգանքին համար, զոր կվայելեմ այսօր: Էջմիածնա լույսը առատ է այստեղ, մանավանդ հոգևոր լույսը, որ կհառազայթե՝ մեզ հոգեպես մխիթարելով: Ես նոր լույս պիտի տալիս ինձ հետ մեր հավատացյալ ժողովուրդին, լո՛ւյսը Ս. Գրիգոր Լուսավորչին անմար կանթեղեն, Սուրբ Էջմիածնեն և անոր շատ արժանավոր Գահակալեն, Պուլկարի մեջ ապրող բոլոր հայերու, շատ սիրված ու շատ հարգված Վեհափառն: Եվ Ձեր սուշև խոսք կուտամ, Վեհափառ Տեր, որ սպասելի մեծ եռանդով ու նվիրումով պիտի աշխատեմ պայծառացնելու, շինեցնելու

մեր եկեղեցին և հավատքը գորացնելու, սերը շատացնելու դեպի Սուրբ Էջմիածին և դեպի անոր Գահակալը, Ամենայն Հայոց Վեհափառ Հայրապետը:

Կհամբուրեմ Հայրապետական Ձեր օծյալ Աջը և կխնդրեմ Ձեր օրհնությունը:

Աստված առողջ, երկար կյանք պարգևե Վեհափառությանդ և հաջողություն Ձեր բոլոր գործերուն:

*
* *

Մայիսի 7-ին, չորեքշաբթի.—Այսօր, երեկոյան, Վեհարանում, Վեհափառ Հայրապետի նախագահությամբ, գումարվում է միաբանական հերթական հավաքույթ, որի ընթացքում Ս. Ստեփանոս արք. Չաքալյանը ներկայացնում է դանիացի գրող Մարիա Ջեքրայսընի «Օրագրություններ 1907—1919 թթ. Խարբերդից» փաստագրական գիրքը:

Վերջում հայր սուրբը կարդում է հատվածներ վերոհիշյալ օրագրությունից:

*
* *

Մայիսի 10-ին, շաբաթ.—Այսօր, առավոտյան, հոգևոր ճեմարանի ուսանողությունը ուխտի է մեկնում Հավուցթառի, Ս. Ստեփանոսի և Ս. Գեղարդա վանքերը:

*
* *

Մայիսի 11-ին, կիրակի.—Այսօր Մայր տաճարում, Ավագ խորանի վրա, ս. պատարագ է մատուցում Ս. Բարսեղ քին. Ղազարյանը:

*
* *

Նույն օրը Վեհափառ Հայրապետը, Արարատյան հայրապետական թեմի առաջնորդական փոխանորդ Ս. Կոմիտաս արքեպ. Տեր-Ստեփանյանի հրավերով, ներկա է լինում ս. պատարագի արարողության Երեվանի առաջնորդանիստ Ս. Սարգիս եկեղեցում:

«Հայր մեր»-ից առաջ Ս. Կոմիտաս արքեպիսկոպոսը, հանուն Արարատյան թեմի հոգևորականության, եկեղեցական վարչությունների և հավատացյալ ժողովրդի, բարի գալուստ է մաղթում Հայոց Հայրապետին և խնդրում Նրան հայրապետական Իր ողջունն ու օրհնությունը տալ Արարատյան թեմին և հավատացյալ ժողովրդին:

Այս առթիվ Վեհափառ Հայրապետին ուղեկցում էին Գերագույն հոգևոր խորհրդի ատենապետ Ս. Սիոն արքեպ. Մանուկյանը, հոգևոր ճեմարանի տեսուչ Ս. Գրիգորիս

վրդ. Բունիաթյանը և Վահրամ արկ. Տերտերյանը:

Վեհափառ Հայրապետի քարոզը տպագրվել է «Էջմիածին» ամսագրի սույն համարում (էջ 14):

*
* *

Նույն օրը, երեկոյան ժամը 19-ին, Երեվանի հայրապետական վիլլայում, Վեհափառ Հայրապետի նախագահությամբ, գումարվում է Գերագույն հոգևոր խորհրդի հերթական նիստը:

*
* *

Մայիսի 12-ին, երկուշաբթի.—Այսօր, երեկոյան, Վեհարանի հանդիսությունների դահլիճում տեղի է ունենում կինոդիտում:

Մայր Աթոռի միաբանները և հոգևոր ճեմարանի ուսանողները դիտում են երջանկահիշատակ Գևորգ Զ. կաթողիկոսի ընտրության, գահակալության, թաղման և հուղարկավորության նվիրված կինոժապավենները:

*
* *

Մայիսի 18-ին, երեքշաբթի.—Այսօր, առավոտյան, հոգևոր ճեմարանի 1978—79 ուսումնական տարվա շրջանավարտ ութ սարկավագները, Վեհափառ Հայրապետի բարեհաճ կարգադրությամբ և Լենինգրադի հոգևոր ճեմարանի տեսչության հրավերով, մեկնում են Լենինգրադ՝ ծանոթանալու քաղաքի պատմական վանքերին, եկեղեցիներին և տեսարժան վայրերին:

Մայր Աթոռի սարկավագները Լենինգրադ հյուրընկալվելու օրերին իրենց մասնակցությունն են քերում ուս պրավոսլավ մի քանի եկեղեցիների եկեղեցական արարողություններին և պատարագներին:

Այդ օրերին Մայր Աթոռի սարկավագներին իր պաշտոնատեղիում ընդունում է Լենինգրադի հոգևոր ճեմարանի տեսուչ Ս. Կիրիլ միտրոպոլիտը:

Մայր Աթոռի սարկավագները մայիսի 18-ին, կիրակի օրը, լավագույն տպավորություններով վերադառնում են Մայր Աթոռ:

*
* *

Մայիսի 14-ին, չորեքշաբթի.—Այսօր ուխտավորաբար Մայր Աթոռ և Վեհափառ Հայրապետին են այցելում իրաքահայ ուխտավորների մի մեծ խումբ:

Մայիսի 15-ին, հինգշաբթի.—Համբարձումն Քրիստոսի.

Այսօր Մայր տաճարում, Ավագ խորանի վրա, ս. պատարագ է մատուցում Ս. Գրիգորիս վրդ. Բունիաթյանը և «Հայր մեր»-ից առաջ քարոզում օրվա մեծ խորհրդի մասին:

Հավարտ ս. պատարագի կատարվում է Հայրապետական մաղթանքի արարողություն՝ Հայրապետական Աթոռի 1441 թ. Սահիգ Էջմիածին փոխադրության տարեդարձի առիթով:

Մայիսի 17-ին, շաբաթ.—Այսօր ուխտավորաբար Մայր Աթոռ և Վեհափառ Հայրապետին են այցելում բուլղարահայ ուխտավորների մի խումբ:

Մայիսի 18-ին, կիրակի.—Երկրորդ Ծաղկազարդ.

Այսօր Մայր տաճարում, Ավագ խորանի վրա, ս. պատարագ է մատուցում Ս. Խաչատուր քհն. Ֆրանգյանը:

Հավարտ ս. պատարագի, Վեհափառ Հայրապետի նախագահությամբ, կատարվում է հոգեհանգիստ Գերագույն հոգևոր խորհրդի անդամ, նորոգ հանգուցյալ դոկտ., պրոֆ. Առաքել Առաքելյանի հիշատակին:

Մայիսի 21-ին, չորեքշաբթի.—Այսօր, երեկոյան, Վեհարանում, Վեհափառ Հայրապետի նախագահությամբ, գումարվում է միաբանական հերթական հավաքույթ:

Մայիսի 22-ին, հինգշաբթի.—Այսօր, երեկոյան, Վեհարանում, Վեհափառ Հայրապետի նախագահությամբ, գումարվում է Գերագույն հոգևոր խորհրդի հերթական նիստը:

Սույն նիստում հրավիրվել էր նաև Մայր Աթոռի ֆինանսական բաժնի վարիչ Գառնիկ Քեհյայանը, որը հանգամանորեն ներկայացնում է Մայր Աթոռի բյուջեի 1979

թվականի կատարողականը և 1980 թվականի նոր բյուջեի նախահաշիվը:

Այնուհետև ժողովին նույնպես հրավիրված Մայր Աթոռի ճարտարապետ Արծրուն Գալիկյանը ներկայացնում է Մայր Աթոռի 1979 թ. շինարարական աշխատանքների արդյունքները և 1980 թ. Մայր Աթոռում և նրա շրջապատից դուրս կատարվելիք շինարարական աշխատանքների ծրագրերը: Թե՛ Մայր Աթոռի ֆինանսական բաժնի վարիչի և թե՛ գլխավոր ճարտարապետի բովանդակալից զեկուցումները լսվում են մեծ հետաքրքրությամբ:

Հետ քննարկման Գերագույն հոգևոր խորհուրդը վավերացնում է 1979 թ. բյուջեի կատարողականը և հաստատում՝ 1980 թ. բյուջեի նախահաշիվը, ինչպես նաև շինարարական ծրագրերը:

Հավարտ ժողովի Վեհարանի սեղանատանը տրված ընթերցի ժամանակ նշվում է Մայր տաճարի լուսարարապետ և Գերագույն հոգևոր խորհրդի անդամ Ս. Հուսիկ արքեպ. Սանթուրյանի ծննդյան 60-ամյակը:

Սեղանի շուրջ սրբազան հորը շնորհավորում են Վեհափառ Հայրապետը և, հանուն Գերագույն հոգևոր խորհրդի՝ նրա ատենապետ Ս. Սիոն արքեպ. Մանուկյանը:

Վերջում շնորհակալության և երախտագիտության խոսքով հանդես է գալիս հոբելյար Ս. Հուսիկ արքեպիսկոպոսը:

Նույն օրը Մայր Աթոռ և Վեհափառ Հայրապետին է այցելում աֆղանական Եկեղեցու բարձրաստիճան հոգևորական շեյխ Մոհամեդ Ալիշահը:

Վեհափառ Հայրապետի և բարձրաստիճան հյուրի միջև տեղի է ունենում զրույց՝ բարեկամական մթնոլորտում:

Մայիսի 28-ին, չորեքշաբթի.—Այսօր, երեկոյան, Վեհարանում, Վեհափառ Հայրապետի նախագահությամբ, գումարվում է միաբանական հերթական հավաքույթ, որի ընթացքում Ս. Ստեփանոս արք. Չաքալյանը ներկայացնում է «Moscov news» թերթի այս տարվա 18-րդ համարում լույս տեսած գրախոսությունը, որը նվիրված է հնդեվրոպաբաններ Թամազ Գանգրեղիձեի և Վլաշեալավ Իվանովի «Հնդեվրոպական Մայր երկրի խորհուրդը լուծված» գրքին: